



KEMENTERIAN PENDIDIKAN TINGGI
JABATAN PENDIDIKAN POLITEKNIK DAN KOLEJ KOMUNITI

SIARAN MEDIA

RPTM 2026-2035: ANJAKAN PARADIGMA POLITEKNIK DAN KOLEJ KOMUNITI SEBAGAI PENERAJU TVET NEGARA

PUTRAJAYA - Peluncuran Rancangan Pendidikan Tinggi Malaysia (RPTM) 2026-2035 oleh YAB Perdana Menteri, Dato' Seri Anwar Ibrahim pada 20 Januari 2026 menjadi 'game changer' utama dalam mentransformasikan landskap Politeknik dan Kolej Komuniti (POLYCC) secara radikal. Dokumen strategik ini meletakkan Kompetensi TVET Termaju sebagai Lonjakan ke-3, sekali gus mengiktiraf peranan kritikal TVET dalam memacu ekonomi negara.

Di bawah kerangka RPTM 2026-2035, POLYCC akan beralih daripada penyedia latihan konvensional kepada institusi TVET termaju yang memfokuskan kepada sektor pertumbuhan tinggi dan bernilai tinggi (High Growth High Value) seperti semikonduktor, kecerdasan buatan (AI), dan tenaga boleh baharu. Langkah ini bertujuan memenuhi keperluan tenaga kerja mahir bagi menjayakan Pelan Induk Perindustrian Baharu 2030 (NIMP 2030) dan Ekonomi MADANI.

Bagi menyokong transformasi ini, YAB Perdana Menteri telah mengumumkan beberapa agenda besar terkait POLYCC, termasuk:

1. Penggubalan Akta Politeknik dan Kolej Komuniti: Memberikan kedudukan setaraf universiti awam dari segi tata kelola dan membebaskan institusi daripada kekangan birokrasi.
2. Penaiktarafan Politeknik Premier: Sebanyak 10 politeknik akan dinaik taraf sebagai Politeknik Premier dalam tempoh 10 tahun akan datang.
3. Program Ijazah Sarjana Muda: Politeknik Premier diberi mandat menawarkan program ijazah berasaskan Work-Based Learning (WBL) bagi menyokong sektor strategik seperti Elektrikal dan Elektronik (E&E).

Ketua Pengarah Pendidikan Politeknik dan Kolej Komuniti, Dr. Shamsuri Abdullah berkata, POLYCC kini bertekad melaksanakan lima aspirasi transformasi yang merangkumi peningkatan kecekapan tadbir urus, penawaran program bernilai tinggi, pengukuhan kolaborasi industri melalui model 'Quintuple Helix', pemantapan bakat tenaga pengajar, serta pembangunan pembelajar yang holistik dan berintegriti.

"RPTM 2026-2035 hadir sebagai pemangkin untuk melonjakkan POLYCC ke persada yang lebih tinggi. Dengan kadar kebolehpasaran graduan yang mencecah 98.8 peratus pada tahun 2024, kami yakin reformasi ini akan terus menjadikan POLYCC pilihan utama rakyat dalam melahirkan 'Pembina Negara' yang kompeten dan mampan," ujar beliau.

Transformasi ini turut melibatkan pendigitalan sepenuhnya operasi dan penyelarasan kurikulum yang "siap siaga masa hadapan" bagi memastikan graduan mampu meraih gaji premium selaras dengan Dasar Gaji Progresif negara.

-TAMAT-

**JABATAN PENDIDIKAN POLITEKNIK DAN KOLEJ KOMUNITI
KEMENTERIAN PENDIDIKAN TINGGI
22 Januari 2026**